

Datum: 21.09.2018.

Broj: 02-06/737

Svim medijima – dostavlja se

Kampanja UKC RS zloupotrijebljena za promociju SNSD-ovih kandidata

TI BiH je podnio dodatnu prijavu CIK BiH zbog zloupotrebe kampanje UKC RS „Svi pod jedan krov“ u svrhu promocije kandidata SNSD. UKC RS je odbio dostaviti informacije o sredstvima utrošenim za kampanju i postupcima nabavke usluga kreiranja i distribucije promotivnih materijala.

Zbog evidentne zloupotrebe kampanje Univerzitetskog kliničkog centra RS „Svi pod jedan krov“ u svrhu promocije kandidata SNSD-a na predstojećim izborima, Transparency International u Bosni i Hercegovini (TI BiH) podnio je dodatnu prijavu Centralnoj izbornoj komisiji BiH. Naime, na brojnim billboardima i plakatima kojima UKC RS poziva građane na ceremoniju otvaranja, nalaze se Milorad Dodik, Željka Cvijanović, Dragan Bogdanić i Vlado Đajić, koji su ujedno kandidati SNSD-a na predstojećim izborima. Na taj način UKC RS vrši ličnu promociju kandidata ove stranke u toku izborne kampanje, iako je strogo zabranjeno finansiranje kampanje od strane javnih ustanova.

TI BiH je prethodno uputio zahtjev za dostavu informacija UKC RS, tražeći podatke o sredstvima utrošenim za ovu kampanju, kao i postupcima kojima je izvršena nabavka kreiranja i distribucije promotivnih materijala. UKC RS je odbio dostaviti podatke o ukupnim troškovima ove kampanje, pozivajući se na zaštitu komercijalnih interesa treće strane i zakonsku odredbu koja omogućava prolongiranje roka za još 15 dana. Bez obzira na ovu odredbu, koja se često koristi za izbjegavanje dostave informacija, rukovodstvo UKC RS dužno je obavijestiti građane o cijeni ove reklamne kampanje, kao i o razlozima zbog kojih ona uključuje i promociju pojedinih kandidata na predstojećim izborima, imajući u vidu da se zbog velikog broja billboarda radi o veoma značajnim sredstvima.

UKC RS, nažalost, nastavlja praksu odbijanja dostavljanja informacija o tome na koji način raspolaže sredstvima, imajući u vidu da je TIBIH u maju ove godine već dobio sudski spor protiv UKC RS zbog nedostavljanja podataka o javnim nabavkama. TI BiH još jednom podsjeća da javne ustanove, preduzeća i institucije i sredstva poreskih obveznika nisu svojina političkih partija, te da će svaki oblik zloupotreba javnih resursa u svrhu kampanje prijaviti nadležnim institucijama. TI BiH poziva i građane da prijave ovakve zloupotrebe, kao i sve zloupotrebe u vezi sa izbornim procesom, putem TI BiH Centra za pružanje pravne pomoći na broj telefona 0800 55555.

Udruženje za borbu protiv korupcije Transparency International u BiH
Reg. No. UP08-07-1-616/11, Ministarstvo pravde BiH, Sarajevo

Sjedište: Gajeva 2, 78000 Banja Luka, Tel/Fax +387 51 216 369, 216 928, 224 521, 224 520
Poslovnica: Mula Mustafe Bašeskije 9/1, 71000 Sarajevo, Tel +387 33 220 049, Fax +387 33 220 047
E-mail: info@ti-bih.org
Web: www.ti-bih.org